



*Senin, 27 Nopember 2023*

**Ogen: Epesus 6:4**



**Ajari Dingen Tegu-Tegu**



**A**nak-anak arus dibimbing ke jalan yang benar bukan dengan kekerasan tapi dengan bujukan, nina Terence sekalak penulis drama Romawi Afrika. Tanggungjawab kalak si mbelin ntah pe orangtua e me mabai anak-anak ku dalam si payo. Sekalak anak langa iangkana kegeluhen enda, mehuli ntah lahang e maka tugas ras tanggungjawab kalak mbelin mpetandaken ras nuduhkenca. Guna ngelakoken tanggungjawab enda kuga carana? Tentuna erbage-bage cara orangtua mabaisa ntah pe ngajarisa. Lit alu la iarapna tegas seh ma ka kekerasen, umpamana, maksaken sura-sura ntah pe si iarapken orang tua, dikune la nggit e maka irawai, ipekpek ntah ipaksa. Ngukum anak e dikune si ilakokenna la payo. Deba kutera la kutera, labo diatena nehken pengajaren.

Kugakin nehken pengajaren si payo, nina Terence e me alu mbujuk, nami-nami, gelah nggit ia iajuk ras ibabai ku dalam si mehuli. Bage me nina Paulus i bas suratna man perpulungen Epesus gelah orangtua ula mpesega-sega anak-anak gelah ula merawa sabap adi merawa ia alu la siarap enggo si paksa ia. Kuga carana, mbujuk ntah pe nami-nami desken negu-negu ia bagi si ngena ate Tuhan. Negu banci ikatakken ncikap tan, mabai ia alu ukur meriah, cirem, ngerana-ngrana labo nintak ntah pe maksasa.

Kekerasen nandangi diberu ras anak megati jadi i bas kegeluhen, alu la isedari sabap iakap e biasa saja. Kususna anak-anak, erkiteken la kerina orangtua ntah pe kalak mbelin ngasup mereken usihen ras pengajaren. Apaika genduari enda, la sitik kekerasen si jadi nandangi anak-anak adi ibandingken ras kai si arus ilakoken man anak sue ras Hak Anak. Nterem denga nge si erbahan kekerasen subuk pisik alu mekpekca, psikis subuk naling-naling ntah pe bulli, ekonomi lit penelantaren. Kerina enda arus siperdiateken dengen sisampati guna ndatken hakna. Kata Dibata jadi gegehta i bas mabai anak-anakta ku dalam si payo.

*➤ Anak langa ergegeh emaka perlu kal itegu-tegu*